



Sarajevo, 12.12. 2019. godine

MEDIJIMA

SAOPĆENJE ZA MEDIJE

Održan 4. sastanak Pododbora za unutrašnje tržište i konkurenciju

Četvrti sastanak Pododbora za unutrašnje tržište i konkurenciju, uključujući zaštitu zdravlja i potrošača između Evropske unije i Bosne i Hercegovine održan je danas u Sarajevu.

Na sastanku se razgovaralo o potrebi usklađivanja zakonodavstva u oblasti konkurencije sa pravnom stečevinom EU, radu Konkurencijskog vijeća BiH i ukidanju etničkog veta prilikom donošenja odluka, kao i o operativnoj nezavisnosti.

Zaključeno je da je potrebno što prije usvojiti izmjene i dopune Zakona o državnoj pomoći i kadrovski ojačati Vijeće za državnu pomoć.

Evropska komisija je pozvala i na usvajanje amandmana na Zakon o javnim nabavkama BiH i kadrovsko popunjavanje Agencije za javne nabavke BiH. Predstavnici BiH su izvijestili o napretku u razvoju elektronskog sistema za javne nabavke, sa ciljem unapređenja transparentnosti.

Naglašena je važnost osiguranja jedinstvenog tržišta u BiH, slobode pružanja usluga i uklanjanja administrativnih barijera u poslovanju.

Članovi delegacija EU i BiH su razmijenili informacije o napretku i planu aktivnosti u oblasti regulisanja profesija i priznavanja profesionalnih kvalifikacija, zaštiti autorskih i drugih srodnih prava, prava industrijskog vlasništva i provedbi prava intelektualnog vlasništva.

Pozdravljen je napredak u zaštiti potrošača. Na sastanku je naglašena potreba poboljšanja jednakog pristupa zdravstvenoj zaštiti za sve građane i usvajanja mjera o ograničavanju upotrebe duhanskih proizvoda.

U oblasti finansijskih usluga Evropska komisija je konstatirala postignuti napredak u rješavanju problema nekvalitetnih zajmova.

Evropska komisija je pozvala vlasti u BiH da usvoje cjelodržavni zakon o poštanskim uslugama, izmjene i dopune Zakona o patentima i Zakona o osiguranju depozita.

Sastankom je u ime Evropske komisije predsjedavao Zbigniew Zach, Generalni direktorat za politiku susjedstva i pregovore o proširenju (DG NEAR), a u ime Bosne i Hercegovine Brankica Pandurević, Ministarstvo vanjske trgovine i ekonomskih odnosa. Više informacija o radu Pododbora pročitajte na web stranici Direkcije http://dei.gov.ba/dei/bih_eu/zajednickatijela/default.aspx?id=20902&langTag=bs-BA.

Direkcija za evropske integracije BiH